

**ՍԵՐԵՆԱԴ**

- Մեր շուրջն ահավոր մըռայլ է ու սև,  
Երկընքից կախված կապարի ամպեր,  
Լալիս են, հեծծում ծառերն անտերև...  
Մի՛ զարթիր, հոգիս, մի՛ զարթիր, ընկեր.*
- 5 *Մի՛ բանար աչերդ ու մի՛ հալածիր  
Պայծառ երազի տեսիլն ըղձալի.  
Ավա՛ղ, երազներ,  
Ուրախ երազներ  
Մի գամ\* են գալի:*
- 10 *Երանի նըրան, որ աշնան ցըրտում  
Քընած՝ կերազե արևը գարնան.  
Երանի նըրան, որ անձուկ բանտում  
Քընած՝ կերազե օրն ազատության:  
Վա՛յ զարթածներին [անհույս ու տրտում]*
- 15 *Տանջվում են անքուն մըթնում սոսկալի...  
Ավա՛ղ, երազներ,  
Ուրախ երազներ  
Մի գամ են գալի:*

---

\* անգամ